

Kjære vener!

Først av alt velkomne til denne markeringa og ein spesiell takk til dei som har tatt initiativet til å gjennomføre denne marsjen langs Tresfjorden! Eg vil også takke for at eg skal få ha denne apellen. Gjennom mange år som prest har eg blitt rysta av alle dei tragiske ulykkene som har skjedd på vegane i prestegjeldet og har lenge tenkt på å skrive i avisene om dette.

Grunnane til at så mange er med på denne protestmarsjen vil eg samle i tre punkt:

1. Vi vil protestere.
2. Vi vil vise solidaritet
3. Vi vil ha trygghet

1. Vi vil protestere!

Vi meiner at nok er nok! Vi vil ikkje ha fleire dødsulykker og personskader på desse farlege vegstrekningane rundt Tresfjord og til Åndalsnes. Det er uakseptabelt at vegstandarden skal vere så dårleg at liv går tapt og mange vert skada så godt som kvart år på denne vegen. Vi veit kva det fører med seg av sorg, tragedie, tap og sakn når ein som er umisteleg for oss dør eller bli skada for livet. Vi vil ikkje lenger godta den situasjonen som vi har nå. Vi vil ikkje at vi i framtida skal bli utsett for ein så stor fare som det er å køyre denne vegstrekninga. Difor protesterer vi på denne måten og sender eit synleg og sterkt signal til våre samferdselsmyndigheiter om å ta ansvaret dei har på alvor.

2. Vi vil vise solidaritet.

Det er mange som er merka for livet etter død og ulykker som har skjedd på denne vegstrekninga. Som prest har eg opplevd desse rystande tragediane på nært hald. Hardt og brutalt, og utan forvarsel, blir folk ramma. Vi vil uttrykke vår djupaste medkjensle med alle som har opplevd dette. Det er ubeskriveleg vondt og ofte vanskeleg å reise seg for den som får eit slikt hardt slag. Livet blir ikkje det same for den som har mista ein som var så dyrebar. Dei som omkom var også ein av oss, glad i livet, glad i sine og difor umistelege og verdifulle for oss alle.

3. Vi vil ha trygghet!

Vi opplever ei stor grad av utrygghet ved å ferdast på vegstrekningane vår. Dette må vi få ein slutt på! Vi vil difor kreve ein trygg veg for born, unge og vaksne. For å få det til, må Tresfjordbrua byggast snarast råd. Det må byggast gang og sykkelveggar for mjuke trafikantar og vegane må gjerast breiare. Det må ikkje stå på pengar og vilje. Vi krev difor at den som har ansvar for trygghet på vegen viser sitt ansvar ved å oppfylle våre krav. Vi apellerar til dei ansvarlege sitt samvit, til deira beslutningsemne og vilje. Ein må ikkje vente lenger! Det fins løysingar og tiltak som kan gi oss tryggheita tilbake!

Finn Arne Roaldsnes

